

四庫全書

集部

欽定四庫全書

少谷集卷九

明 鄭善夫 撰

序文

修江先賢錄序

史以考信古者有國有史古史莫信於春秋春秋魯史也聖人之文約而苞其義大而公自秦人黜封建則史氏用獨獨則遺於是乎有紀錄之書或以時或以地胥

如志也自秦而下凡百餘家大率有四病不避則溢不
濫則漏名蕩乎實之謂溢有所怯之謂避信輕之謂濫
識疎而聞寡之謂漏四者於其人焉不鑒於春秋之義
也雖然顧補史氏之遺耳余序修江先賢錄知周子之
善用春秋也賢寧產也寧春秋艾子之國也錄賢而係
之修江者其漢修江錄山川之能也始於漢者封建既
黜之後也建置沿革乃始於三代之先者假一邑之文
統元也統有五號曰正曰閏曰偽曰賊曰篡弑或正名

以統實或去實以全名用宋庠之意而折其衷也賢有
六科曰忠孝曰事業曰文章曰特行曰貞節曰仙釋集
有五義曰正曰續曰附曰別曰外正者上也續者嗣也
嗣似也附者依人以傳也猶附庸之依於大國也別者
別也別閭閻之範也外者以道其道而外之也曰公曰
先生者鄉先生有尊之之文也錄而必按其履者不枉
其是非之實也凡是者皆用乎春秋者也錄實則不溢
號明則不避科分則不濫義該則不漏是錄也但補史

氏之遺耶稱信史矣

醫林集要序

余嘗讀內經不盡通曉然頗會其意自古成毀相因陰陽散伏民鮮戢穀於是乎有草木金石之英以衛之而憲之於經是故犀羚蠶蠅貫衆茵陳豨苓狗脊酸辣苦鹹神竒臭腐齟口齧齒垂吻裂鼻而各有投人之經而裨其生焉者及其傳之既久人不解究竟任疑用獨而經乃樊亂至仲景李杲始肆為論說發其疑義而經復

一明然方土異宜古今殊運兼以庸醫固滯顧懵然莫適其所從耳成化間有王氏璽者迺復苞并百氏之異同沿時通士偁長置短約為大常而不畔於經於是乎陰陽相勝之機氣運旋斡之變胗切攻熨之法宣補和平之方木石洩液之分輕重沉浮之數翕然遂大定名曰醫林集要凡若干卷鄱陽胡公購而梓之以公於人其惠博矣始予病肺羣其醫而藥之至彌歲月弗療豈真方之不足以愈病耶是書之行有仁之惠也人有

言曰不為名相即為名醫其作用巨小功惠舒疾雖若弗倫而仁之流一也人亦有言曰弗善為醫莫善為相有所操者有所縱也公名韶時為閩大方伯云

草木子序

草木子葉子奇氏栝人博物洽聞達於古今生元季詭時匿德於龍泉之槎溪立言以昭厥志人亡識者所著有範通玄理太玄本旨各二卷詩十有六卷文二十卷本草醫書節要各十卷齊東野語三卷草木子二卷草

木子成於洪武戊午狴犴中稽上下之儀星躔之軌陰陽五行生尅之運海嶽浸瀆異域希乏之物神鬼伸屈之理草之變魚蟲之尤律歷推步易衍之大宗釋老禮制之書而之於六籍之緒大歸同焉野語記時事失得荒兵災異而文弗避而義則則乎春秋古稱虞卿非窮愁不能著書草木子其善窮哉草木子云者草計時木計歲以况其生而傷乎其言之立也或曰草木子劉基宗濂時人詳觀誠意集未之及者而濂叙太玄本旨似

不心贊其能夫二子者亦蔽賢乎哉凡人賤近而貴遠
知者相世機則掩其識昔揚雄譔太玄法言與州箴以
比迹聖人當時雖劉歆輩號稱知己亦拙其書顧乃盛
傳於後世好奇者以為與於孟軻然玄實失之滯法言
州箴亦多迂謬今觀草木子其義至精論甚正使遇賢
知者闡而張之走揚子矣其與法言太玄並傳復何嫌
耶而或者又以惟鯨胎生無無華之實胎卵濕化貴賤
之類病之是惡足以累其成哉舊本凡二十八篇今纂

為四野語凡三卷今為二其七代宗子溥殺青而行之
并曰草木子古語云傳先之美仁也刻成晉安鄭善夫
為序正德丙子夏日

重修南湖鄭氏族譜序

舊譜依歐陽法系圖以五世一提竊以人身各具五世
五世一提則高玄捍格昆弟失倫且子前父名孫前祖
名義不可為訓今酌蘇法以父子為世父上稱行明昆
弟也稱爵稱公稱號若謚子下稱名明父子也帙必實

錄示信也傳贊銘志備本支詳所親也於賢者雖疎亦
備賢賢也為僧道不系女出而失節不系絕之也出婦
與失節不系既絕於其夫也系於子之下明天下無無
母之子也女而貞與婦而烈傳志附其父婦節與賢附
其夫勸也帙附祠堂儀節附祭田附家法家約禮之備
也鄭出唐別駕莆南湖淑公派閩中丞元弼公後傳八
世至源深公徙三山今其墩亦曰南湖不忘厥自也祠
始源深公重始遷也以四世祖天祐公配以功德推而

立之也有附祠以無屑者祔食恤無屑也善夫比到莆
得通元弼公以上譜到仙邑得八虎以下派因拜祠墓
合族人今增而詳之居三山南湖十世孫善夫謹誌

僉事顧箬溪平寇序

古稱蠻夷悍輕易怨以變控御失所則負岩峒相嘯呼
如蜂屯螳雜不可爬而梳之風氣之以也甌閩古百粵
地也潮漳之隩枕海其陰多大山連亘深阻小口中
漫上廣下銳蛇蟠數十里萬道莽如行不可駢肩世惟

欽定四庫全書

少谷集
卷九

六

蠻夷所據而獷獠亡命之徒往往竄而附焉為孽梗州
郡兵至則憑要害下矢石孤伺鼠伏以逸敝我之騷騷
急則移山蹈海視嶽崎澆瀆若平地然數年歷文武圖
議攻撫並用然力用頓而患且益滋蓋攻而無法則我
去而彼來撫而無信則朝聽而夕叛朝廷大有憂焉乃命
三省之師悉草薶而禽獮之由是而僉事顧君以簡行
十月之吉視師於潮君至潮號令惟嚴鞭韎惟明裨貳
惟良甲卒惟馭閱惟時動惟機正月誓師進次於饒平

由是而掇箭灌威大漶擣木窖跣泥園而夷之殲渠魁

三十俘其鄙盡自潮之南蓋先漳巔之聲而禡之氣者

昔之善師者果而勿矜果而不得已行無行攘無臂仍

無敵執無兵以制勝也君洊西書生也一旦仗鉞即戎

以當悍輕巨寇即能決全勝於幾之先以闕介胄之口

語曰章縫之流不可語金革豈盡然哉君知足以集事

果足以有功恤足以輯民文足以經世此一事也舉其

全不有却走馬以冀乎潮郡丞林侯序君之績欲吾黨

欽定四庫全書

少谷集
卷九

七

張之次年為正德丁丑秋七月日晉安鄭善夫為之序

太白山人漫藁序

太白山人漫藁者吾友孫一元太初所為詩也夫曰漫
者觸而成聲無謂有謂之云也太初關西豪杰也束髮
入太白山為山人繼入終南汎觀恒岱遵龜蒙慕宣聖
遺韻止於鄒魯之郊久之踰江淮下吳越鵬冠布袍獨
立於萬象之表志了如也夫高蹤遠影者顧以世為不
足為乎及讀其詩皆悲壯奇崛感激奮發而卒澤以冲

和如神龍在淵變化不測得時而興乘雷雲以雨天下
噫是豈忘情適性為犁輿來祀者倫乎或曰太初離親
戚去墳墓遠遊於方之外與名教或不相蒙者是何言
哉孔子曰丘也東西南北人也復欲居九夷莊子陵去
齊適越管幼安徙於遼東孫明復隱居於太山之陽邵
康節去家入洛四十而後娶古之賢達流寓於外要必
有所為而安焉者獨太初爾耶或曰吳越之人右文人
易致名譽太初操觚飾智揭揭然為高意有終南之捷

者夫以太初之才稍自抑以應今之世何往弗達顧甘心寂寥卒其世以飭無端功名耶吾嘗與太初乘月汎洞庭浩歌漁父傲睨一世似無少芥蒂於其懷又嘗與卧西湖之上見其息深深時乎天壤時乎地文要固有道者吾聞無欲而後可應世今之應世者可勝議哉漫藁凡若干余為之序以傳藁而曰漫則固傳也太初不與也

子通序

子通一書余卧罪長安時口授林璧者每講一通命璧錄一通居兩月璧去講錄止述而篇嗣是無從講者遂不嗣錄是書出一時應接殊有語病噓辭安能盡余意耶雖然實余獨得之心而應之口者也雖然今之事舉子者用不行也故璧亦叛去於戲此學晦久矣舊習之膠人也固矣余安望世之余知也雖然不作溝中之斷千載之下會有知者余竢乎千載之下嘉靖元年春三月念四日求志齋夜坐偶閱而志之曰子者四子也曰

通者通理也

送王子北征序

雙林王子將北征十月初吉觴王子於新亭之上王子
曰諸君子其亡命余耶鄭子晉曰子今可以踉足而前
矣日余夢羣羊而角子其先者夢而診其夢曰羊祥也
羊而角解之文也子將先羣祥而起與又兌為羊兌正
秋也子之起也其於秋與今余夢而信也前是癸酉之
歲余夢其伯子余夢而信也亦無異於王子何王氏子

數數余夢寐間邪昔商宗夢說按夢而得說得一說遂
嘉靖乎殷邦方今天子秩德商宗蓋夢寐似說者將物
色而賓之以嘉靖其天下王氏伯仲其人與王子工若
天而佯若人吾見其注焉濇焉積之謂矣聞之越矣時
日及矣余春曹賓人之舊也今雖矇矓向曾與於麗綺
之觀矣無將兆魄於余行且感於天子之媾者予子今
塗游於四樊吳越淮徐其歷也梁楚在西燕趙在北目
將熒之耳將傾之當武皇之世天疆其毒百昌悁悁凡

辛酸苦鹵靡不有也調之鼎俎以奉於天子在此行乎
王子興曰嘻未牧而牂在輿未弋而鷄在突吾且疾鷄
牂之狃吾遽說之能當余曰古語有之遊心上行人定
其亨伏志無極天贊其吉且也二三子之與子友也相
券以內也相助以消也下是曷以命子二三子揚解而
前曰君不見吹劍首乎下是則一吹而已矣鄭子之夢
子也非信也其命子也信也於是王子載余言焉遂北征
前丘生行已外篇序

前丘生余友傳子也行已外篇歲為卷歲之乙亥與余
交余贊之錄其所為詩篇始乙亥始交余也前丘生詩
淵致瀟散多發之性情其道江湖林壑神仙隱逸直臻
其要妙蓋本風塵表人也平生志不專詞章然其為詩
實上下魏晉抗聲於武德天寶之間大歷而還不論也
余誠愛之慕之其不能使余忘情者是篇耶前丘生日
所切磋者悉見之外篇自余外皆豪杰士也豪杰之士
無文王猶興詎分以辭章自坎乎詩三百曰思無邪吾

夫子之言也前丘生進於是矣其發之性情故曰行已其見之文字故曰外篇云

送夏方伯赴浙江序

明有天下置十三省省統以左右布政使即古之方伯也有地數千里省之僚采與郡州縣之長凡所謀議伯主之天子之政令教化伯宣之天下之財賦與百供具出之民者伯處之伯之任實重且專也非望弗遷非能弗釐非德弗鎮非若他官之徒以釐以鎮者吾又以見

伯之難也夏公棊為吾閩廉吏風裁肅清未幾天子使
之伯於浙非以其德且能乎哉夫浙隸府十一壤地三
千里其僚采官屬財賦當天下三之一天子政令之行
必以先之又非若他省比公何以為之吾聞公向以御
史巡斯土莊嚴練達於今為烈所以理吾閩者是道也
況既理之地有不易於理者乎天下論諸藩垣以浙為
首吾見他日論諸藩守臣必首公矣

蕭司訓還永豐序

蕭子佩校閩邑三年不樂於心一旦集諸子言曰吾寧
役而形而復紛而志吾不當時命者也吾其歸諸子長
揖而進曰先生業明而行成末世而遺行位予得於校
也夫何桎於修蕭子曰子欲我為犧牛與欲我為龜曳
尾於塗中與吾智不予遇也毋吾已秋且薄乃嗒嗒而
歌曰陽之山兮龍龍景風濟兮山豐擷芳華兮盈掬聊
容與兮山中又歌曰恩之水兮濺濺鴻之颺兮遠天原
有桂兮隰有蓴人率滑漈兮吾惡樂為彼園念不移與

議不及庭去之日琴一劍一圖書數數無長也鄭子善
夫曰道不興世世不興道則至人之德隱時也深根寧
極不得不聞此之謂滑疑之耀故曰物不喪已俗不失
性故不賊命得不殉名蕭子也符吾素矣

送魏負外序

正德八年春二月大中丞彭公理蜀寇請餉於朝大司
徒孫公議轉楚粟應蜀請疏以員外魏君行彭公以蜀
寇故請孫公以楚粟故特魏君大若事也魏君之楚重

若負也或曰制士在內三年得封其父母父母沒得享於墓魏君楚產也朝卒其事夕得致天子之命於其先行而忻於情勞而愜於私或曰大夫出不貳事公不窺家詩不云乎王事靡盬不遑將父閩鄭善夫執二議而觴之曰聖王敬義而厚情志士敏公而緩私君請權於斯二者雖然君子有必用之情有必恤之私比者刑臣煽孽九洛盜起齊梁楚蜀之墟殲於兵者十三叢於盜者十九朝廷募兵揀將括金需糧三年而中外為虛寇

不加少其故何哉有志者能無私於用情乎不也他日到軍門以告彭公歸以告孫公以復於天子必有成算者矣此則愚之所以皇皇致私情於魏君也已

送張巽所先生赴大寧序

甲戌之秋巽所先生行為大寧博其徒鄭善夫議於泉山夫子曰巽所先生學博而通行介而不羣篤於文文尊六籍孔曾思孟之書敦頤頤顯顯熹載之格言至於耳周不害非佞鬼谷雄說潔寇安施齊丘百家之噉嘈七

十二子之著作一切屏而不序則其文也理然而三賓
於禮部一伏於青田青田地鄙而風漓漓則無介鄙則
弗廣人習細故駭人之作新是猶張咸池於洞庭之野
始於懼中於怠其卒也惑而愚矣今者大臣知之言之
天子天子知之遷之大寧夫大寧武地也巽所儒官也
行復何以處之夫子曰噫其信然與吾聞大寧左揖太
行右控大都黃金之臺鬱乎嶷嶷即燕昭王所禮郭隗
致樂毅者下有易水其流湯湯即燕子丹縞素壯荆卿

之地至今其氣激烈而悲切其俗勁義而易感我國家
化成其人已相忘於文采非猶向之所謂鄙且漓者材
成損益顧異所何如耳邇者惡少哨聚殺人成丘高梁
淮蔡播宕為墟然則今日之教武未可畧也他日或有
毅軻輩出其門而分禍變之憂乎抑有韓范輩出其門而
鼓順平之盛乎是在異所善夫以告異所命書之以自益
壽圖序

介壽以圖非古也圖以物昭其祝也古之為壽也以言

今之為壽也申之以圖是故有圖蘭桂圖滄海圖龜鶴
松柏岡陵固也惟人子於壽其親也意蕩乎言言蕩乎
物有恩勝者矣余表李錄甫壽其父菊坡先生作椿萱
圖而於芝蘭松桂山海龜鶴蝙蝠麋鹿之類無不舉圖
成率子若弟拜堂下而祝之如其圖者三凡遠邇戚屬
畢至各觴酒為壽如前祝酒訖命予以言尚其事余於
菊坡與孺人有外戚之好有內子姓之分也言詎可少
哉言之則情真情真則多而不溢不溢則可書也於是

予書

繡嶺州堂六咏序

少司徒二泉邵公以身養請於天子得歸錫讀書於惠山繡嶺之間編艸而堂時即物而歌人見其適也君子於其歸見錫類之性焉於其歌而適見惕艱之情焉夫既祿而身不違性之至者也既逸而心不遺情之至者也至性者道之會至情者義之樞夫然後知純臣與純子也凡今之有君有親者可以興矣善夫為公小吏繆

受公知故既序州堂又賦六詩而使孺子歌之尚意也
劉氏祠堂八咏序

劉氏之昌於潮也自劉允始允之昌其氏也賢大得潮
人官程鄉循化大得程鄉循化人世歆潮祀實祖劉氏
祠始允之三世孫中允少集配以允二子龍圖學士昉
光祿景禮也祠在城東湖韓山之後湖山麗而闕革宗
元明祠完圯因之弘治間十世孫繼善用諸父瑄文理
命廼協昉景二宗脩新之治而墀堂設而宗枋序而遠

邇釐執秩量典物百籩用光犧象昭明於時乃事於房
烝擇柔嘉敬祓除水陸之蒞之醢陰陽之物匪不時至
於始祠為侈焉猶曰不足以訓則揄美也於是乎有顯
聞人八咏詩以裸其懿光教不忘也鄭善夫聞之曰君
子之德遠矣吾於茲祠得人道焉復始也能備知美也
能傳復始者義之章也備物者禮之周也知美者知之
飾也能傳者愛之原也章義能祭周禮能敬飾智能建
原愛能親此四善者天之所貽也吾聞之天道艾善必

豐劉氏食艾也有豐矣夫

悠然亭序

嘗觀之世人遯世泉石者則有廢棄不平之況窮年宦
海者則有舟楫失墮之恐二者窮達累之累則無適也
閩義溪泉石僻野正遯世者所不遺陳堪氏作亭其際
名曰悠然是將無廢棄不平之況者歟誠有堪者昔陶
元亮不欲為五斗折腰憐故園松菊飄然長往彼蓋不
以窮達累其真而得其生者故采菊而見南山適也堪

無窮達之累者乎無累則無物無物則無我無我則無弗適矣是故萬色與目會萬聲與耳會萬氣與神會萬變與形會而心適也雖然人心不固久則移堪子母厭山棲而思以舟楫駕長風則不免有失墮之恐為我慎之

林下增恩序

林下增恩何以名紀榮也留餘陳公歸十年矣新天子推恩及高致之臣例進階為朝列大夫尚故秩若曰有金紫之貴有上下大夫之別有不煩以官職之守有鄉

邦之光榮也則不也吾於公為鄉小子頗識公初公之
歸義溪也鄉人駭之而嘖嘖相語曰是何歸之早也及
朝廷以恬退風天下吾黨例公者不能二三鄉之人復
嘖嘖相語曰某也與某也不與夫夜行不休者鮮有不
辱其身也是則公所獨榮而人亦以榮公也迹公之故
可以風矣可風可賦可賦可傳也是詩倡自公朝野大
夫士咸倚而和焉艷其榮也吾別有以發之且自勵云

壽蔡母詩序

蔡母生二十九年生浩四年而主亡苦心立浩垂二十
年而浩達達十年克承母懽母心始無苦懽且無苦是
之謂飡天之和壽所因也君子曰達浩以父母也天之
與耳善夫末眷於浩詳母德於其六十也賦南山之篇
凡十有六句云

葉古厓集序

古厓集為文若干首今古詩若干卷其狂傀雕鏤澗矜
燥濕錯然弗倫而悉和之以清揚藹如也余嘗辨其音

節多放手唐宋之間惟五言近體於杜為似蓋亦宛然充其性焉耳杜詩渾涵淵澄千彙萬狀兼古今而有之他人不足彼乃有餘又善陳時事精深至千言不少哀世之學者劬情畢生往往只得其一肢半體杜亦難哉山谷最近而較少恩后山散文過山谷遠而氣力弗逮簡齋蠲而少春融宋詩人學杜無過三子者乃爾其他可論耶吾閩詩病在姜腰多陳言陳言犯聲姜腰犯氣其去杜也猶臣地里至京師聲息最遠故學之比中

國為最難焉若非豪傑之士鮮不為風氣所襲者況遂
至杜哉國初如林鴻王偁王恭高廷禮輩過然離羣出
黨去杜且顧遠與古厓閩產也余讀古厓詩蓋所謂豪
傑者竊嘗評其詩如春空游絮隨溫風飛颺衝條附葉
雖乏穠綺然自有一段丰神猶至京師者越浙度淮駸
駸乎北軌矣尚論風氣哉或曰如國初數子何如昔人
云詩道如花論高品則色不如香論逼真則香不如色
古厓葉姓名元玉清流人守潮為古良吏其行履之詳

見於長汀李貞夫氏歲彊圍赤奮若相月哉明撰

少谷集卷九

欽定四庫全書

少谷集卷十

明 鄭善夫 撰

記

唐石墓田記

正德十一年春巡按監察御史胡公文靜肇置朱晦翁墓田於建陽崇正學也墓在縣西唐石大林谷九頓峯下先時考亭九世孫洵澍哀田若干與唐石居守者用

釐歲事守者易代而困田弗資且變歲事不侔又凡幾
易代弗復也子朱氏道在人人之心有美弗復謂之右
文邪語曰不肖者廢之賢者興之公至亟用惕然下令
有司處田若干畝畀守者率時祀歲正輸公賦若干其
令有司不得傭焉用是歲有積可亡困官可亡變積贏
可備物用是祀無爽於時無弗備於器而凡塋垣圯桷
無弗佗佗然葺也黍稷既登百籩既盈犧苴肱肱有禘
有翼於戲子朱氏之道如是乎光哉凡祀有公田世不

廢者惟孔氏之徒與釋老為然然釋老乃愚夫愚婦出
以徼福有司傭之不少貸而賢者每斥而廢之且欲廬
其居火其書而屏其道乃爾豈錄其孫子躋其有事貸
其傭垂百代有崇而無殺如子朱氏者正邪之辨顧若
是縣哉胡公政於閩首役念於其林墓君子曰見人心
矣考亭十幾世孫烜一日走輿情於少谷請記其槩貞
諸珉以無忘公崇正之休十一月初吉晉安鄭善夫記

禹穴記

禹穴在會稽山陰昔黃帝藏書處也禹治水至稽山得黃帝水經於穴中按而行之而後水土平故曰禹穴世莫詳其處或曰即今陽明洞是已又云禹既平水土會諸侯稽功於塗山尋崩遂葬於會稽之陰故山曰會稽穴曰禹穴至今窆石尚存或然也後二千餘年而司馬遷氏來探書禹穴歸而作史記文章煥然為百代冠說者謂是山川之助也又後千餘年而晉安鄭善夫氏及山陰朱君節王君琬氏來復探禹穴尋黃帝藏書處乃

玩梅梁摩挲窰石覩先聖王遺像得禹穴於菲井之上
徘徊瞻眺想其卑宮而菲食為之喟然興懷又想其執
中用智與臯夔稷禹之為臣又為之憮然自失也夫自
禹跡以後三千年間遊者不知其幾而惟司馬氏顯此
山川之能發為文章亦惟司馬氏夫三千年而僅得一
人於山川顧止以文章顯何哉豈山川之能僅足以煥
人文章邪世有不為文章者於山川何取也自昔至人
見轉蓬而造車觀游魚而造舟得河圖而成卦因洛書

而作範咸取諸物也子在川上曰逝者如斯夫不舍晝
夜余乃今知所取於山川矣禮登高而賦余未能賦姑
記余言如此云

石龍書院記

石龍書院在紫霄山中岑嶸修阻林木莽然豺虎聚之
闕而居之者石龍黃子也黃子在京師時與王湛二子
論聖學聞道之的乃期作室於幽深以候二子者共之
余時居吳吳東南之衝也得多接士故得見黃子繼得

見二子與聞所謂聖學者歛然自鄙其平生憤悱而歸
杜門五載仍俵俵如也乃復出山走四方求所謂三子
或有以成吾志者由是遵會稽探禹穴登陽明之廬無
人焉由是東走天台南入雁蕩始復遇黃子於委羽之
陽語平生驩甚黃子曰吾向所謂書院成矣遂偕處旬
月晝談夕息余盡得聞所未聞於子黃子其真成我之
志闕於乎此學自孔孟而後千餘年作者只濂洛數子
其他役志載籍揭日月而行者可勝論哉吾儕幸嗣絕

響今者其會也然一念依違遂至沒世噫其可畏哉乃
今欲於紛波中定慮更期三年裂冠而來子其虛榻候
我楊子云在夷狄則進之在門庭則麾之余嗣是又不
重有畏哉書院凡五間中為凝道堂東曰幽賞西曰寓
遠其窩曰虛白東軒曰天風西曰空翠曰石龍云者黃
子之先在洞黃山下有湖有石如龍生湖底水枯輒見
故云

遊北山記

北山去黃岩澄江六七里至山之樊巖石窠官有洞穹
然曰小有空明天每風則聲從中出復曰天風門山以
洞勝故復曰靈巖巖下有瀑其聲琤琤然注為川昔朱
晦翁與杜方山南湖講學其上以川之狀與樊川為類
故名曰小樊川後有杜清獻杜司農者起而張之故村
曰杜村巖之上為嶺曰招仙嶺東轉為厓縣水百餘丈
龍穴而淵曰龍厓厓下有亭曰二公亭上有谷曰芝谷
氣和則紫芝生之谷折而陁青壁崕崕泉涓涓出石罅

為少谷亭又西為鷺峯峯益峻林木益翳凝紫出天畔
北瞰赤城南臨雁蕩西望括蒼東極滄海之隩復名曰
紫霄水甘如飴其源出峰頂一泓顯伏不常即志所謂
影迹潭是已莽蒼之交黃子書院在焉余時東遊訪黃
子居再信遂定北山之約窮高極深復居再信時大雪
壓山風蓬蓬振屋猿狖晝嘯熊兕夜號余與黃子披氅
衣兀坐萬仞之表伐松枝燒楮拙叅訂周易仙如也
於予自余結髮遊名山川四美二難往往不相值間或

相值矣其有如黃子者乎時艱歲徂窮荒遠海能使余
安沈寥而忘羈栖者誰歟吾聞之馮危履艱以居仁也
余遊北山於黃子得鍊性之道矣同遊者芝谷子空明
山人亦城林益菴

思牧廳記

台州古稱風節之地其俗近樸其氣用剛其民易興以
善義浙東西數郡浮姜繁華而台皆反之及其敝也胥
靡以偷胥成以訐一不相能至聚徒旅相攻擊訟纏拏

畜不解接楮死狴犴罔有悔者且風然曰豪哉豪哉狡
猾之徒則延蔓為兇愚黔黎治之急則糾黨與縛長吏
緩則日就積翬至其君子則或決廉隅藩翰而為之是
故牧斯土者不曰民頑梗吾化也則曰吏奸蠹吾政也
夫斯民也三代之英也豈今昔不相倫至此哉吾聞之
牧人猶牧馬也和其唇吻順其恒度寬其銜勒時其食
飲馬異類也固可馴之以驟馳而況人乎目其櫛飾鞭
策之法繁燒之刻之饑之渴之而曰世無良馬顧弗思

已矣金陵顧君華玉挾才識志節為令有聲徵為天官
郎久次出守開封忤奄柄謫居嶺表者三年始復遷茲
土至則喟然思曰民敝久矣無他牧之無法也由是進
父老而風之曰爾若赤子也若爾父母也以繼自今若
與爾濯而新之不率者有憲勦兇振墮昭勸懲長廉耻
政未及朞而六邑風歸郡故有燕居久就坳圯君經易
櫪桶塲飾粉堊叅以瓦甍環以卉木旁有松數十株高
可數百尺磐石巍岌可亭其上延遠風作虬龍聲或曰

是松元至大間趙某所植者或然也時若風教未純俗未變民有乖戾君休衙舉燭坐其中於邑不憚小吏報曰漏已三鼓矣君曰吾方思吾旦所出者

漳州重新府治記

嘉靖二年春二月漳州府治成張子集家屬示厥成績前叅知周子某左理是邦贊厥具美請憲諸貞石遂委役於少谷某附志業於二子者役無愛也禮匠人營邦五等其堂涂庭序廊廡閤闌各有差以戒分也堂皆南

嚮其崇修數尋以臨明也有燕饗之堂以肅賓合衆共
議庶政其隅有室以退思過今之郡治即古之侯國也
漳州南衽海又控島夷實維雄邦三方皆連亘巖砦峒
蛩修阻厭大兵其控制防虞之艱實不與他邦類先是
漳之治弗治堂構櫨撓腐級甃四折其燕堂為墟蝕於
輿草門卷傾塌吏露處是謂弗莊民之慢政且久也嘉
靖改元張子假臺臣出牧於漳至則喟然曰夫土階既
遠明德新民是用莊以蒞者維茲弗治乃可以蒞乎於

是乎度貲於郡倅杜君昂鼎君仁郡提刑胡君宗道得
請游粟若干石於是乎以七月載功以龍溪尉鼎彥漳
浦尉莫魯司征郭玉耆氓王虞煥以其能受勾會以南
靖尉闕鳳受陶旒平貿百用凡石材瓴甌鎡錘槓幹絢
璽之屬一時而登傭游民而役之七閱月而治成為燕
堂八楹崇五仞六尺修十尋而上橫度九尺之筵十四
之而下遷外帑於左周序蓋甃悉以石用杜寇灾名曰
廣濟前為堂治其漫漶鮮以白盛黃錯而繡綰堂東西

為卷二十楹南為門二階三閤既槩昭其觀也夫漳
人營室其庀材最艱材出延建以海至輸轉率登於其
直茲維始事也龍溪茶磴有靈石裂決漲木千章來會
城下是困崖嶠十許禩者耄老驚曰自吾生於斯齒齷
而豁未見此豈天將神之以相公之營耶之役也貲出
於游粟力傭於游民神相以材問之四人無厲者足以
考君子之政矣古人云作室猶治身門堂寢室猶之四
肢百骸也而吾中處猶心也門廡不治猶手足之不仁

也手足不仁不累心乎哉古人掃滌舍宇正使心地清
明明德新民一也張子之政蓋自心身之治而用之民
者也高閑夷庭豈徒為莊耶將使繼者覩其外思無歉
於其內也張子諱鵬西川洪雅人為侍御史激奸振滯
見正德中云是年秋九月日昃記

福清縣復祥符陂記

嘉靖元年春正月福清縣復築祥符陂夏四月陂成始
興水利也閩八郡其四衽海民之半鹽魚以生福清土

益鹵海益患其田下下不蕃粟稷而蕃人故四人外給
恒十之七八焉宋祥符中令郎簡相土可田者得五十
頃而餘相水可豬者得三十里而餘於是乎䟽請截江
而堤廢民居百浚達而渠之引源於石湖之嶺導而界
江豬奔殺悍東抵於旗西臨於玉融南循於五馬北極
於玉屏之隩所跨遵義永福永東西文興凡五區轉瘠
卸鹵田化而上以始自祥符故曰祥符陂蓋聖子其浸
也洪武二十三年陂決文興潮殺稼越正統七年邑丞

陸忠復之正德十三年陂決南臺大娘垠潮復殺稼民至是大歉明年海虞陳侯迨來又二年下令於邑中曰余爾牧也忍視爾歉歉今與爾復而陂以薄楊俊受稽畫曰而往監之凡田頃出十夫十頃出百夫約畝受力駢力宣勤沉以巨衝實以砂黃由是荷鍤執畚四人雲至量日齊工乃湮乃防田畷報程餽夫走饟甫三月而告成績由是變腹敷膏候氣執成江有恒流歲遂大有繼自今即有災嘯罔悠患由是鰲老黃孺呼抃謹躍舉

曰陂之悠悠樂只有秋微侯之載齊民其亡瘳由是某
某某來致衆情請永憲於石水利裨荒政者也程伯子
之上元朱晦翁之浙東塞決堤起涇堰古則王政也而
時慢之侯今之舉無軼代論世哉侯起甲科令海邑毅
斷神察太宜厥官此其政之一也余知侯故樂序其績云
重修桂林文廟記

正德辛巳春三月桂林文廟成行釋菜禮畢善夫退而
言曰我夫子道法百王功垂萬世孔門而下之所稱論

其至矣余過關里拜夫子遺像蓋得觀歷代帝王崇尚之典云凡祀法祀功自王都郡邑皆祀夫子其祀物與祀天並者夫子之功則天也桂林之祀何始乎始於宋省元潘枋廟成墀下茁二桂因名曰桂林祀有田鄉社行之不廢成化間桂復茁墀下郡太守唐侯珣因益田若干歲久廟圯鄉耆宿某等復聚而成之增四配享復益田若干祀枋牖下以枋首事也今之佛老之教比之六經豈啻爝火於大明也今六經行天而爝火亦然者

何哉夫子不攻異端而異端廢孟子攻楊墨而楊墨廢
後儒無夫子之道孟子之辯使佛老蔓及於後世至明
王之法不能制焉傷哉明法凡郡邑許一寺一觀備祈
禳也今天下之鄉社虔於所事至與食飲同要雖明知
者不免其故何也孟子云能言距楊墨者聖人之徒也
枋始為之至化其鄉不為佛老而專事夫子在祀法亦
當血食其社也故既祀夫子亦尸祀之云董事者某某
益田者某某祠部員外郎鄭善夫撰

周太僕遇寇事記

辛未春三月山西行太僕卿周公杲如太原遇賊於朝歌變至令妻子縋垣而避之賊執公需馬射公中脅公創甚正冠堂上抱天子誥勅矢死以委之時脅者百至公亡屈也俄有朱千戶者渠魁也覩公肅其鄙曰朝廷大官何得無禮却公行不可曰不去羣小無知慮有奇巧時縣尉曹安亦在虜中固請從之賊重公居之樓上命主者為食覓醫為藥其所以尊而衛之者甚周公意

其無他也以義讓之賊弼然起曰吾豈願至此哉吾為賊瑾驅耳公曰瑾既戮曷不改圖曰嘻吾無生之門矣既而糾其黨去之謂曹安曰吾不趾此城者為好官在也而謹護之公妻子既出亡及牧有夏生者迎而施舍焉於是乎俱免於難噫奇哉余時正阻兵淮北實詳公顛末以為變亂中美談且聞公所以滅賊之策於人人扼腕久之山東羣盜不過狗鼠之雄耳身無頓師無律烏合而起志不在大也壤鄰相驅乃醞此大患朝廷鑒

凶門命將出師散中帑錢幣不下數百萬連五六年而卒借徼外之兵然而山東西兩川河淮南北城陷者十三死者十五僵尸成丘流血成川使天不悔禍有隱憂者矣國家養士百餘年縻以好爵裕以重祿章縫之流平居長節亢言炎炎一旦倉卒棄城逃生甚有鬻陳賈敵以僥其身者吾見其人矣介冑之士食恩累世積威蓄銳以竢用於一朝廼聞風而靡猶豢芻者忘意於膏粱卒見鸢鼠反怖而遁也否則幸禍以徼功養釁以邀

賞視芟民命猶棄草菅然彼何心也哉

雲溪記

吳楚之東浙之西去海百數十里曰吳興厥土曠夷無
連峯巨數山蔚特翳蒼蛇行不數里即斷而原不能伏
虎豺茗雪二水洄其際雪水源出吉州諸山茗水出武
康西北流二百餘里道吳興或滙或渴為浜為埤而後
東瀦於大湖水皆安恬無四序涸溢昕夕可方舟自茗
東折派為小渚曰雲溪名不見圖志或曰是溪辟囂去

煩所見者白雲而已或曰隱者與雲為伍溪故多隱君子與吳越之交風淳而土腴且宜蠶作民易以為生其山棲淵伏也無風波豺虎之恐故世之隱君子多托焉而藏於漁畔也溪之潄麗菱芡葭蓼美竹箭有柴門面溪上屋數間桑柘數百株逶迤紆回蓋觀察副使張公水居也始公羈貫時釣游是溪凡三十年出而料理天下事又凡三十年髮已種種乃得歸是溪茲者畢志於白雲之表與嘗怪蘇子瞻惡居西夷買田宜興又疏請

居浙竟以人事官情違志樂土固靳於與人耶余避人海上稍厭蠻俗不免有風波虎豺之恐欲謀避地而力苦不可於公之歸是溪也不無注深思云

鳳陽記

下龍門東入迥溪六七里百折至衡山溪門漸狹水漸融溪又東二里有山截然如鳳形其名曰鳳峯又曰鳳陽入鳳之西曰西上有登龍故碑泯歲月下有廢宅畔者據之相傳宋丞相鄭魏公避地處也或曰莊也其旁

多古塚又西半舍曰聖洞委蛇幽深天欲雨則煙雲從
其中出吾先子嘗曰鳳陽可以返吾真也既而先子沒
先夫人亦沒善夫用治命卜西上之原築為塋徙故碑
於道左而新之勒年月及先子姓號於其上結廬以守
勤所志也曰青山如故時之化如斯廢宅荒塚而昔且
如今吾安知吾後殊今所見後吾者攬斯文而化思見
見聞聞相繩以傳之無窮庶鳳陽其不丘墟哉庚午臘

月日記

春雨遊大石記

大石在陽山之西四五里嶽危峻拔特出衆巘跨者為梁卧者為几峻而立者為丈人登之者非攀援弗克下有流泉風雨則其聲淙淙然泉石之交有松數株盤屈偃蹇若虬龍然旁皆椽竹拱木鬱不可數中有菴曰雲泉或曰以其石之潤而雲澤而泉也或曰以泉流雲也吳中山皆土少石有亦不能奇惟陽最多惟雲泉最奇故曰大石今年春予有事許墅許墅距石邇而未能即

往也三月朔崑山令方豪氏過予予方病肺得豪則甚
驢言大石則又甚驢時且雨遂汎舟聯句抵石又得王
龍臣益驢且出肴酒酌梅花下復聯句至夜分時羣動
聞寂但聞所謂淙淙然者脫然有遊仙之想又於枕上
各賦詩合若干首明日晴乃策竹上絕頂盼太湖及洞
庭諸峯鐫姓名歲月於石而後返

夜遊虎丘記

自大石歸方子興未竟余病且間復登虎丘日入戒行

月入告至時暮雲未歸夜月不生山川之境陵谷之態
閭閻然若韜其靈秀而不售也廼挾奚奴曳輕裾秉燭
前導列為火城轉於中亭踞千人石藉草而坐取憨泉
而飲尋至劍池取闔閭神道不獲又以燈取石崖上古
今人陳迹又緣法堂入千頃雲閣取壁間韻賦詩詩成
僧大泉具清齋白飯對嚼而歸世之高興者有如吾二
人哉噫吾之高興而感亦大也方子為崑山彊二年而
六至吾十年於外至者再今此則偕方子也前此非方

子也方子亦非吾偕也後此者而復誰偕哉吾與方子
踪跡蓋未定也後吾游者亦或有以感吾感正德七年
春三月二日記

賓陽樓記

浙東數州栝最遠而天台而雁宕而三衢而金華周千
里皆山栝最峻由栝東南遡湍流而上二百五十里曰
青田山益峻地益遠民益野雖有學校之教才則鮮也
朝廷考學官之成視人才之有無多寡以上下其績故

得是地則怏怏然入是地則靡靡然至於殿堂之傾圯
邊俎之廢缺禮樂之崩壞弗念也正德三年閩進士張
子某為之至則大有憂曰是豈人才之不縣於教而故
限於地耶是豈殿堂邊俎禮樂之類不足以飾教耶吾
人敝之病也首治先師殿廡次葺泮宮次表鄉賢而祠
之次新祭器次講諸禮儀乃復集多士議建宗文樓鉤
材於梵因力於天衷貲於衆厥日維良厥位維東厥堂
維巽維三月樓成乃自命曰賓陽以為諸生問學之地

名本諸書而義則取諸易也易曰日出地上晉君子以
自昭明德士之登斯樓者顧名思義將有所激而興者
乎夫其有思也必有興也人而思人而興則青田人才
殆自茲樓富矣然則張子之為之也固在殿堂邊俎禮
樂之外也

少谷集卷十

欽定四庫全書

集部

少谷集卷十三

詳校官臣李如筠

中書臣劉源溥覆勘

總校官臣知縣楊懋珩

校對官臣編修沈清藻

謄錄監生臣施華

欽定四庫全書

少谷集卷十一

明 鄭善夫 撰

傳

海仙人傳

閩大方伯龔公弘吳人生而穎少能通古墳典剖疑圖
徽隱東海蒲華塘賞幽自為將三十年抑而為舉子文
字進士起家以經緯當世事又將二十年廼思當世之

無以為也棄兩浙大叅知歸海上日歌白雲篇疏南華
經義上揖古人而與之游若真能拔世網而仙者嘗曰
吾先代都官君祠部君再有隱德吾有水石痼吾嘗如
有忝於二君子也時人稱為三隱先生云公處海上登
年以載逆瑾宣焰玩大權杓化天下豪杰而馳之公一
不為聞亦無戒日與窮島黃髮翁泛輕舸浮游震澤雲
水間賦詠自怡或赤脚走海上峰觀蜃氣興沒龍吟蛟
翔夜半日出咸池晶晶然長嘯大叫自以為世外奇觀

及天地和均聖天子思得逸才以振聳踣弊乃復簡為
今官時之人復稱為海仙人云鄭善夫曰吾嘗聞古之
神仙往往有隸宦籍而皆豪杰輩為之故葆真寓形完
天遁人聽其往也王喬之葉東方生之依隱玩世葛洪
之勾漏蓋其真有所得正不執滯於通隱之分也是故
隸圉不卑貂珥不亢拘餓不窮潛形不窒鋌刃不嬰視
世間一切榮辱起伏生殺壽夭化萬有若劇戲然而隨
之者彼何人也哉龔公其真有所得矣夫

南湖三先生傳

南湖三先生露公莊公淑公其先滎陽人也遠祖昭晉時為泉建刺史過莆口愛其風土因遷祖墳於南山昭固未家莆也三公舊譜云唐玄宗時人世居閩之侯官天寶二載避李承昭之難自侯官徙永泰又自永泰徙莆之南山以祖墳在也山下有湖是為南湖結講堂其上以修儒業莆古蠻俗六朝之間閭無聞士照諸載籍唐興將百年亦未聞有作者自三公入莆人始興學其

後十室九書堂龍門半天下南湖之響振之也當稱為
為南湖三先生云講堂在南山之麓因夢錫僧乞為菴
遂捨為菴及改構其旁復遇金仙請為刹復捨為刹今
城南五里廣化寺是也立寺之後移祖墳一十二丘於
西峰之下莊公徙潯陽淑公徙仙遊惟露公居莆田是
為三邑之祖凡稱南湖鄭氏者皆三先生之後也嗟夫
三先生豪傑者也業儒於比屋未為儒之時而二林忠
孝一方文武勛庸科第為天下甲雖其學力而開先者

誰歟岷嶓積石河漢之始明者固有所推矣彼固無文
王猶興者譜稱露為太府卿莊中郎將淑別駕皆無可
考然是詎足為三先生重輕哉

鄭顛公傳

天祐公字君作叔公之後少磊落不羈知元運將革自
負以豪傑之才耻與牛駑同阜處南湖塢中意洒然也
是為南湖處士晚年世益亂上下溷賄上自達魯噶齊
下至邑子丞尉競為饕餮降其風而化之乃憤然有回

淳反朴之志恤恤然賙貧鮮寡一物價平出納使世之貪
鄙也銷後游四方齋餘貲凡遇生物無大小貴賤即鬻而
放之如是者十餘年人不能測其所藏咸呼之曰顛公云
公嘗假三世田其價已盡後其子匱乃召而告曰而父
所鬻田若未盡而值也給之至其孫匱復告曰而祖所
鬻田若未盡而值也給如故晚年每辟火食日醉醇酒
數勺微醺輒麻鞋散髮走道上暢歌屈原漁父篇以自
況其志或勸之仕乃喟然漫答曰而不見飛廉氏馬乎

其一朱鬣白毳龍駱鳳臆終日不釋轡罕以熱死其一
垂頭昂尾駝頸駱膝踠齧善蹶棄諸野終年而肥古之
達者固不苟潔以罹患不避穢以養精也茲益得之舊
譜叅之故老所傳云爾古之人有逃名佯狂裂冠毀冕
而求自拓其所極者世未易知也埋蛇渡螳近不在其
身則惠應之於其子孫云

南湖高士傳

昔人云澤中之蜥蜴不用則委蛇草莽間用則神變化

為霖雨士或然哉高士才氣英邁有大志傲睨一世若
無難事而乃涪湛於時焉年四十就憲府辟三年入補
尚書曹道莫有合者咲曰髮種種矣安能以一資一秩
僕僕岐逕為哉去之南湖之畔菟裘葛巾據梧曳索與
魚鳥為伍歛然若忘情者及其論經世大務即捫闔弛
張洞視千古之上識者奇之間嘗語人曰士當用人勿
為人所用又曰蒙莊巧愚奇而奇也大雅明哲正而奇
也蓋抗高志遏浮埃者晚尤好黃白之術及閱李道純

中和集即飄飄然遁形智以往所謂道不偶乃自用以康其身者歟高士平生極踽踽少合然與為冥契者又皆世令人如靈武王偁博陵林誌漢孟吳航高廷禮輩締文字之交云誌嘗曰峭直捐介可以信董史佚蕩伉俠可以結朱孟其見所稱許如此高士諱璠字仕琛鄭氏號曰純菴蓋守其黑云

烈女輝傳

烈女輝者五河令周應文之季女也其先姬姓末裔即

國為氏散處方隅應文蓋居庸之世也輝生而含慧抱
素七歲知女訓嘗論夏侯令女曰一死事便了何截髮
斷鼻乃爾應文甚奇之時有張耀者將子也習業於應
文雋爽絕於流輩應文亦甚奇之間遂以輝屬焉待年
于歸大禮未就而耀以正德九年六月死時輝年十七
禮不敢踰閭奔計吞聲痛悼自廢其飲食應文憂之糾
戚屬諭意不少變旬有二日遂自經於中堂中外聞者
匪不嗟惜聲動山後先是耀之家買棺畢氏得巨木一

本析而二之至茲遂以及輝唏天其偶然邪輝性嗜花草墀下自藝數十本英藥繁牕日供采擷輝死一夕盡為之凋焉山後暑多蠅自輝之死輝之家蠅亦去類盡其次年乙亥所司部使者以事跡聞表其門曰節義越人鄭善夫聞之曰燕趙之風悲以壯其生人多慷慨奮躍有所激觸即輕舍其生自古然哉故感燕丹之義視死如赴者白虹遂為貫日往往有焉輝一女子也一念之至至感草木動天時是故城積杞妻雷擊齊廷天人

通貫之理古今一也吾嘗論燕趙之士使充以仁義道德顧但為俠客劍士之稱顯後世已邪輝之天資冲粹豈又不在學者歟夫

應先生傳

應先生昌者浙之仙居人也少讀書知大義即務為躬行中年以母老稍出干祿久次得為分宜縣尉常祿所入悉移致於母旁及於母兄自奉惟敝衣糲飯晏如也吾聞先生事母與母兄備極顛沛初自京師歸至台聞

母兄疫台距仙居百餘里乘夜走山谷穿虎豹及門抱持日省侍兄愈而後即安在官時有術者談其母祿當盡即茹素自罰日不安其位託請歸寧徒步旬日至血其膚後居母喪又一一執禮時年已六十餘猶頓毀守墓側寢處苦塊衆止之曰奉几筵禮也中哀之年以死傷生恐非所以為孝乎由是族黨遠近上自大夫下及衆庶咸翕然稱之至有聞風而起者云先生平生急人之難有同聞者客死無依先生既為殯之且力還其喪

焉其輕財仗義又如此在官數年廉慎以則恤民隱剔吏蠹凡數十事蔚然入於人心給事張文稱之曰安得似某者百人分布中外天下何憂不治太守朱華謂其操持出衆有儒者之風焉中丞韓邦問提學蘇葵王崇文咸亟稱之其子良今為翰林吉士相時謀道修先生之行云鄭善夫曰吾聞君子之事親也下任力中任勞其上不匱先生間闕致養堅忍致敬禮而無忒慕以終身又能潔已惠人以成其志而享其令名所謂任力與

勞而不匱者非邪孔子曰置本不固無務豐末比近不說無務修遠詩不云乎惟孝友于兄弟施於有政蓋言反本修邇者也先生之施顧有司之者而未大邪正德中善夫與良定交於吳越之間得先生之行故為之論次其事

樗翁傳

少谷子曰孔子曰小子何莫學夫詩學詩則多識於鳥獸草木之名夫識其名也非他也聖人取象以明理比

類以成德咸取諸象也爾雅栲山櫟其色小白生山中
類漆櫟散木也莊周之言曰商山有櫟結駟千乘隱將
芘其所賴然匠石去之不以為高名之麗者以其散也
嗟乎神人以此不材陰符云人知神之神不知不神之
所以神櫟翁西川洪雅人也張氏名某字某持釋書日
以繕障盲為事又通堪輿之學達古今事變成虧福禍
與天地之化經綸之文言之鑿鑿張而翁之闢而闔之
放諸無用之地取諸櫟也不龜手不用以泝澠統豈櫟

之云子翁昔居花溪去邑會再舍時文物在邑翁有子鵬穎脫囊中翁遷其處俾與賢士遊以成其德云蓋藏金於山藏珠於淵葆其全而用之天下者也鵬為侍御史遏權璫斥奸佞危言於朝不合則退合則進進則蓋於其所事世益方之棟橰輪題與道消息云昔者眉山蘇明允隱居放言不位榮利後其子軾轍咸躋通顯翁得無類之然彼且著權書以示可用而軾轍又止以文章顯夫示諸無用者豈真無可用哉又況不為軾轍者

其上下何如也樗翁寓神於散合志於空將無以儒者之道為風歸邪或曰釋氏之學古賢知者多之蓋其玄化自止直寄之以定其情焉爾矣

雙節傳

閩叅議鄭子毅一旦過鄭子善夫言曰毅宗數奇曾大母祝大母劉以節傳以有毅之身綫如也述二母之履命善夫言善夫相世自廢久亡有言者也以毅故以二母故故言而傳之傳曰先鄭氏信州大氏鄭氏二節婦

曰祝氏曰劉氏劉祝亦大氏故二婦非恒婦也祝歸孔
貫生騏騏六歲而孔貫卒時祝年二十有六騏婦劉生
潤潤十歲而騏卒時劉年三十有三先孔貫之父雅簿
楚安鄉母劉氏留家祝事之百爾慎甚劉賢之雅聞而
亦賢之及孔貫疾革謂曰吾奇嗣子稚呱呱爾吾死之
後汝少汝若何祝泣曰無貳敢忘夫子卒全貞傍孤抵
有成立及劉之事祝肅雍靜一猶乎祝也其於騏於潤
亦猶祝於孔貫於騏也其寡之年祝較少姑婦辛苦卒

昌鄭氏堂有竹樹有羣鳥來巢有攸馴止鄉之人奇其
事同知陳綱欲表其節不果知縣董綸江源相繼給其
家廩後踐祉各以壽終潤子毅成弘治己未進士守資
兵曹今為右叅議云鄭善夫曰上古亡節中古勵於節
後世不風節故亦亡節氣使之然也不風無率不率不
風二婦蓋得之天均者豐也豐乃無矯吾嘗怪今史之
不足徵也力贍者廼克致致者未必真吾嘗恨逸者吾
不見美也雖然古亦有然

少谷子傳

少谷子南鄙野人性極拙且懶少居貧不識榮利以親
故竊食公家持論迂濶不切時務不能更故態不得於
今之人好古書不能讀讀亦不能析疑義年及三十而
一無所成分必為棄物近復得丘壑痼疾藥不能療行
將解脫束縛着道履短衣登岱宗望東海歷江淮浮震
澤訪石橋窮會稽鴈宕諸山而後歸廬於武夷與所謂
少谷者閉關息焉守其玄而葆其真云

少谷集卷十一

欽定四庫全書

少谷集卷十二

明 鄭善夫 撰

誌銘

方處士墓誌銘

方氏世居歙東鄉歷遷開化元亂復避地於邑之慎山
代有名德天順成化間有曰克共處士者諱倣少孤孱
即能誓志強立自慎山徙居棠陵連歲興土木任播植

收山川之利以身其勞糾宗屬分貸積贏歲廣祀田為
則不匱居鄉閭溫溫無疾言倨容人多諒其悃悞凡有
紛難率就之平焉性不飲常預羞醴以款賢士對客笙
歌宴樂久而弗衰吾文山昔嘗出遊處士結之於婺州
吾語人曰匪物之貽抑以其好賢焉耳其親賢善施類
如此初徐宿州瑒之窮也長而無室處士力妻以宗之
女弟後宿州貴顯儒生學士翕然服其識也俗歸女率
重富輕儒亦因以少變云處士平生履患難一不動容

色壯歲役於職貢哀致方物挈厚直過鄱湖疾風失柁
儔衆皆喪魄處士獨歌嘯若遺畧不為變及濟衆咸肆
之以為莫有道者其大都如此配吾氏有淑德能承處
士之志生男五人綉縟綺縠細孫男六人豪唐度承廣
輿豪綺之子也幼時穎異有大志處士嘗摩其頂曰祖
宗積德百餘年天畀女豪將大我後乎每屬其子善成
之弘治甲寅月日年五十八而歿其亂命惟豪也後豪
果第進士著賢聲於昆沙二邑徵為比部郎為文伸縮

造化聲實日起將進為名世之賢識者以處士方食其報云處士既葬之十有七年余與豪定交吳中又七年復合於京師因得詳處士行誼嘆曰君之賢達顧其所哉豪感泣曰先公注目於豪豪深愧非達非玠無以慰先公茲葬許年墓猶未志子幸為我圖之余覽狀復嘆曰余嘗見隱君子不由學問其作用自與道合者豈質美乃爾抑亦山谷之生不習五味其氣清明不近都會其風猶龐厚與其食報往往智巧者不能跂其萬一

古所謂善人巧於用拙者其在斯人乎其在斯人乎再拜而為之銘銘曰古有善人百年而興爰踐其德以雄其成吁嗟乎處士之名

同安林處士墓誌銘

處士諱應字應彬以字行曾大父五秀才大父乞奴父凱明世家同安之翔風瀟浦山處士兄弟四人處士以支子為叔氏後少孤失學及長始知書旁獵衆技如星數九章之類悉通其理值業中奮勤動門戶弗克竟其

所之比子元長即令讀書日勵以古人事業曰吾悔不
學聖賢耳毋令若蹈吾迹已也鄉故逃儒即農自處士
首先教子而後章縫之士起惜元身立名揚處士弗及
見之耳處士平生好惡多用其天資每讀史至奸臣傳
必切齒唾罵及至忠臣義士未嘗不為之泣下平生臨
義事不顧利害直以身當之弘治壬子海寇起處士計
執其首者數人後有反仇事露至徙家以避之其事每
為人所傳如此同安富室多坐食少務農桑處士身致

贏尚計口力田抱甕決渠備勞苦而適也間語其子曰
女雖讀書茲亦不可不知持家靳一緡雖禾頭木屑亦
不忍殄然有告以困窮又恤恤捐所有人以為儉故又
稱其惠云先娶許氏生男某某夭女某適某某適某
某夭許以罪去娶鄭氏生男某某女某適某處士生正
統己卯月日卒弘治己未月日年五十六越壬戌與鄭
氏合葬長興里鞍嶺葬後十六年為正德丁丑元登進
士又明年友余於京師始以狀來乞銘於戲處士古所

謂木强者惜夫執之而未化也元今濟以學問處士之
璞於是乎開矣於戲處士嗇於其身顧宜有元也銘之
曰璞之純以開於後之人

從叔南京監察御史竹泉公墓誌銘

從叔侍御公殯將行其孤昭泣告余曰自先子歿今八
禩然音日遐而德日幽孤之不肖也成矣後茲庸詎知
有先子也雖然兄之耻也余曰唏是誠余任也明幽追
遐今其圖之侍御諱行字世濟彊志利學成幼不貳達

於行而無流懷故日載其耀弘治乙丑以春秋成進士
出而執令於增城增城屬廣輿區逼五嶺歲厭大盜於
是乎下則以為民紀針兵順農以遷其途資亡振淹以
賴其生立方育類以綸其恒德由是日引月長民變而
順臚言風蜚三年無秕政也入為侍御史還軫白下復
監廣右之官日罔安志又三年持母憂去歸嗣父憂哀
苦以死年四十而三方侍御未歸時有相者曰祿戾是
數亦伊邇余時以侍御燕頤駝肩鶴武而虬髯必將大

施志於民國不然之也乃今其然哉豐聚而嗇施阜體而儉庸志士蓋惜之也侍御平生疏曠強義不下氣不為嗾嗾之德蒿目而急世之憂其在增城也上任其果嘗厲戈揚盾以蕩羣盜而三奪其魁又嘗掩枹鼓卸囊韃以身誘巨逋至犯其剡及祛以脫其好以奇制師類如此曾祖塾兵部主事祖文韶父明壽官娶陳氏無子寔祔壽官之封繼娶陳氏生男四人長即昭次某某孫男某某卜以嘉靖元年秋九月日葬於赤龍之陰銘

曰桂也可以為麗大折而小泄也蔽牛者櫟神用以拙也誰之弗材而久持揆也朝穆之抱真離數世所媒也

故嘉定教諭吳公墓志銘

公名汭字子潔吳氏系出宋觀察使朝甫之後公懋有隱德母葉氏生二子公長少慧從舅氏堅講毛經數年大翫於詞翰於理閩士之雋者附焉如御史危行戶部郎陳嬰進士余衷李廷朱璽謝珂與珂之弟璠皆樂有成者成化二十三年省試上其名於禮部弗售以母老

分校唐昌七年以最遷儀真過臨安母卒扶喪而南卒
喪改嘉定又七年乞歸邑士夫僚屬與門下諸生願留
以考成不克歸二年卒得年六十四實正德五年七月
十一日卜十二日壬寅厝於東郭鳳丘之陰以母弟濬
祔孺人林氏男二曰德祥曰德祚孫男一將葬德祥致
孺人之命曰先夫子遺言必得君銘諸幽敷請余諾曰
善夫嘗館公家日得侍言竊記公自誦曰吾中歲窘甚
身化居妻績絰不能得父母甘脆先人棄吾哀而屑此

官以奉母也母且死旁皇遠道肩輿櫬跋梨關三百妻
孥以徒步從事今雖鼎食未嘗甘也嗚呼公其有至性
乎哉可銘也已詞曰維躬弗羸惡既其庸維齒不豐誰
守其宗嶷嶷鳳丘爰止而官

閩進士林允大墓誌銘

君名德昌字允大以字行林姓十九代祖穆自光州固
始入閩居方山十三世至津龍為元尚幹官地以官顯
而稼翁而同德而烜烜始遷瀛洲生成成生鉉其別業

在尚幹者多宦名惟瀛弗耀君鉉冢子也穉時以敏受
專毛詩識大克弘治二年錄闈進士籍再校於禮部棄
乙榜歸力學奉親期必効所志十七年夏以母陳氏疾
顰天求代坐億先母以終享年四十有三噫其可哀矣
夫負志而竟以休用情而不獲養誰之為哉斯其以然
者天也娶吳航高氏生子男三長曰繼其次曰憲曰舉
皆始學而文女三高先君死繼室以臺江陳氏歸二月
而寡今將以是年某月日奉君之柩合高氏宅於某山

之原其友林某為具狀導其子繼來乞銘善夫哀其志而感其情可禡之以傳也銘曰負志而遺用情而訛維天匪吾匪脩維何至德之陽有丘其瑩貞珉是勒爰尚而聲

墓表

時菴高先生墓表

鄭子隱居鰲峯之北有高子澱者九人與游時登山釣水嘲風謔月余必九人偕而九人亦莫予之逆也邦人

見而指之曰十才子來矣復曰四生蓋詆之之辭也然誰詆之而名亦嗣是日起濬家最貧然事母至孝事兄至弟身菽水得錢即以畀其兄妻紡紆為生卒歲無愠余久而難之丁丑秋余有四方之役濬啣其母陳氏之命來曰先公德浮於用有美弗徵濬復弗克肖恐遂沒於濬之身後世亡述者先生幸哀而表之余覽狀嘆曰風之下久矣自閔墻之刺作君陳不作漢晉唐宋以孝友起家者一指數而盡傷哉吾方吊往昔而諦觀乎天

下久而弗吾應也何意乃今得高氏於吾之鄉吾無得而闡之耶無幾何林子鉞傳子汝舟報曰淑之母於是年月日死矣殯無容棺之所再旬日而即幽於乎孝友之門戾此其極也悲乎今者尚忍公之弗表哉高出宗迪功定之後元有慶生通三經為醇儒入明旭最以行業顯旭子基基生四子其諱鑑字孔明者即公公少彊立博載籍至于常犯紀臣侵君子妨父妾婦乘夫弟兄相虐迭瞿然失席叱咤而唾罵識者已知其有所不為

矣為文用古於今試輒不利晚以父日耄就分教曹州
尋遷清遠入官忻忻然歲分餘廩致甘脆為養先事繼
母至相忘如所生者其於先世遺產悉以推諸弟曰吾
方食祖父之休矣鄉間義之以為躬行孝弟而公自視
欲如也父沒之後即無復宦情歸結菴以老曰時予時
乎吾不知為偶乎為奇乎舉世溷濁孰與其潔衆人芘
芒孰揚其芳復自稱為種蘭道人云於乎公才足以幹
世行足以轉俗其有緒餘見之丹青文字人皆寶而惜

之況其大哉侯官吳鏘聞人也嘗曰先生如高陵廣淵
吾未曾陟其樊而涉其涯安能測其中之蘊即使天假
以位移孝移順施于有政豈但如古之所謂狂者不掩
其志哉吾聞晉王祥之後衣冠之盛甲於江左公之弗
施也或者天將侈之於其後也況澈也復修公之業耶
公墓在螺峯之麓其詳見於舊志余今舉其大者表之
後千百祀有道公之懿德者視吾之文

敬齋鄭先生墓表

先生諱伋字孔明其先亦石魯氏七世祖正叔出姑子後遂為鄭氏居常山之象湖世濟其德至先生而大先生吳康齋之高業弟子也風聞楚越之交蓋闖然游於萬仞者余生也晚不及挹先生之容近季子道者揖余於京師求表先生之墓因得睹行蹟聞風慨然樂為執鞭而恨不可得者先生三歲聞父母哭而知哀五歲誦故事十三讀易治舉子業文理蔚然二十為博士弟子及省試一再不合棄之曰顯親揚名恐不在是也乃走豐

城拜於丁潛軒之門求踐履實學時年三十有幾矣廼復見康齋先生於崇仁康齋曰此間工夫非朝夕可得恐誤子遠來對曰此心放逸已久求先生復之耳敢欲速乎因受小學日自驗之心身徐得聞四子六籍之要久之於道若有見焉乃歸築室於龍池之上日取諸儒論議一切折衷於朱子凡古載籍鮮不讀但不讀佛老之書嘗謂其毀肢體滅人倫即不容誅又何待讀其書而後辯其謬哉一時名士若蘭谿章楓山開化吾文山

南昌張東白皆與相可否所著有易義發明卦贊讀史
管見觀物餘論蛙鳴集凡數十萬言惜以燬盡其存者
僅十之一云吾嘗聞康齋之學最强毅直致不屑屑於
文字箋註約破碎而大同之卓然有六經鑄我之見誠
所謂發章句之迷而立於獨者夫章句猶筌蹄然本以
發迷欲學者既得而忘之也豈為終身溺之而不究心
於章句之外者乎吾聞其執喪極哀祠墓殯葬一本之
家禮設義學立社倉事事皆著實地上作業要非所謂

瑣瑣破碎者故自號曰敬齋又曰斷迷子蓋有得之康
齋者矣然挾經濟之術三謁公卿而不一試豈所謂逆
流退飛者邪古之君子知之則言言之則行聖人之心
顧亦何嘗忘天下哉使假先生以年其用舍內外之辨
必有分矣先生行履備見傳志此特其大者余故表之
以詔後之尚友者

少谷集卷十二